

Waar gebeurd!!!

Ik vund 't vrogger altied machtig mooi as wij in 't veurjoar weer kleine kuk'nties kreg'n van Schoester Bannard. Je weet wal, van die 1-daagse donsige pieperties. Dat kleine spul kwam eerst in de kunstmoeder. Dat was een soort holt'n kiste, met ramen d'r boven op en een rooie verwarmingslampe d'r in. Ze wollen allemoal onder de lampe stoon zodat ze in trommeltien onder de lampe stund'n, totdat oma kwam met wat riest en gemalen beschut'n. Doar begunn'n ze dan al gauw wat te pikk'n. Ik en mien breurs en zusters lag'n dan ur'n op de knie'n veur de kunstmoeder om noar die kleine bollegies te kieken.

Het spul gruide mirakels en as ze veur 't eerst in de renne noar but'n mugg'n, mus'n wij oppass'n dat de eksters d'r niet van kwam'n stel'n.

Dan kun je ok al gauw een keer zien wat een haantien was. Die kreg'n het eerst een kammegien. As de haanties gebog'n veerties in de steert kreg'n zag 't d'r niet zo best veur ze uut. Dan kreg'n ze de kop d'r af.

As de haanties op war'n kek'n wij uut noar het eerste ei van de inmiddels jonge henn'n. Iedere morg'n ev'n kik'n of d'r al iene op 't nust zat. As dat het geval was rend'n wij noar oma om 't te vertell'n. Wij kund'n hoast nie wacht'n tot ze d'r afgang. En as ze d'r af was gauw kiek'n maar verdorie gien ei! "Och, dat gef nieks," zee oma, "Die leg wal gauw, die hef al dunk in 't gat!" Dat betek'nde geleuf ik dat de henne al 't gevuul had dat d'r een ei zat.

Noe woonde d'r bij oes op 't darp een zekere Freia. Freia was een wicht met een tamelijk mooi figuutie en een oarig kop-pien maar ze har ze niet allemoal op de rij. Ze gung graag met kleine kinder um en wol zulf ok graag een kind. Nou dat huufde gien probleem te wez'n want bij oes op 't

darp wurd ze altied Vreigraag nuumt. Veur
jongs die aans gien wicht kunn'n ver-
sier'n, kund'n altied nog met Vreigraag.
Op zekere dat was 't dan ok zo ver. Teg'n
de tied dat 't kind gebor'n mus word'n,
wurd'n de spullegies kocht. Het leek een
flink kind te word'n. Toen de kleine zich
anmelde wurd de dokter roep'n. Die onder-
zocht heur, keek verboasd en zee: "Kom d'r
maar af Freia, je krijgt geen kind, je
bent niet in verwachting"

Hoe kunt toch, alle leek d'r toch op.
Schijnzwanger of dunk in 't gat????
Raar verhaal maar toch,

woar gebeurd!

De veteraan.